

MESU MAJU IN CORO

EDITZIONE IX

CUNTZERTU DE MÙSICA FOLK

DOMÌNIGA 18 DE MAJU
A SAS OTO DE SERO (H.20:00)
IN SA CRÈSIA DE SANTU SIMPLIE IN
TERRANOÀ.

ANT A PARTETZIPARE SOS COROS:

- OLBIA FOLK ENSEMBLE (TERRANOÀ)
- S'ISPERA (OLLOLLAI)
- SANTA LUCHIA (THINISCÒLE)
- SANTA NOSTASIA (UDDUSÒ)

ORGANIZAT: OLBIA FOLK ENSEMBLE

AT A PRESENTARE: DANIELA ASTARA



IX RASSEGNA

CONCERTO CORALE MUSICA POPOLARE

MESU MAJU IN CORO 2025


BASILICA SAN SIMPLICIO
18 MAGGIO – ORE 20:00

PRESENTA _____ Daniela Astara
DIREZIONE ARTISTICA _____ Olbia Folk Ensemble

Coro

SANTA NOSTASIA

di BUDDUSÒ



SANTA NOSTASIA DE UDDUSÒ

Su Coro Santa Nostasia de Uddusò naschet in su 1985 gràtzias a sa passione de unu grupu de amigos chi detzident de formare custu assòtziu paris cun su mastru otieresu Mario Coloru.

Mancari cun maicantas tribulias, su coro at sighidu in sas atividades suas in custos 40 annos e paris a sos componentes giòvanos chi si sunt annantos in sos annos faghent parte de su coro finas paritzos componentes de cussos chi ant fundadu su coro.

Como, su coro, est sighidu dae su Mastru Pietro Marrone, unu direttore giòvanu e Uddusoinu chi at dadu ancora prus briu a sa crèschida armoniosa, dende-li un'imprenta locale noa e in su matessi tempus arricchende su repertòriu cun cantones folclorìsticos e religiosos de su panorama regionale.

In custos annos, su coro est coladu in maicantos palcoscènicos importantes siat in s'ìsula ma finas a s'atera ala de su Mare Tirrenu, ùrtimas in òrdine de tempus sunt sas esibitziones in su Santuàriu de San Luca in Bologna e cussa in Arcidosso, ambas duas fatas in su 2024.

In mesu a sos reconnoschimentos retzidos, s'ammentant sos primos prèmios retzidos in sa Biennale de Otieri in su 1985 cun sa cantone "Sa pitzinnia" e cussu in su 3° Cuncursu de Cumpositzione Musicale "Antonia Mesina", fatu in Orgòsolo in su 2015, cun sa cantone "Sa bellesa".

Su coro podet bantare unu repertòriu folclorìsticu e religiosu mannu meda, cun cantones de sa traditzione musicale uddusoina, nugoresa e regionale.



IX RASSEGNA

CONCERTO CORALE MUSICA POPOLARE


MESU MAJU IN CORO 2025

BASILICA SAN SIMPLICIO
18 MAGGIO – ORE 20:00

PRESENTA _____ Daniela Astara
DIREZIONE ARTISTICA _____ Olbia Folk Ensemble

Coro

Olbia Folk
Ensemble



OLBIA FOLK ENSEMBLE

Su coro Olbia Folk Ensemble naschet gràtzias a chimbe amigos e a sa passione issoro pro su càntigu, mescamente pro cussu sardu. Podimus nàrrere chi est unu coro giòvanu, bidu chi at solu sèighi annos de atividade, finas si agiumai totus sos cumponentes ant un'esperientzia in su càntigu de trinta annos; una parte acudidos dae sa polifonia clàssica e sos àteros dae su mundu de sos coros folclorísticos.

Atacados a sas duas limbas mama de Terranoa, sos cantores intonant càntigos in sardu e in gadduresu semper cumbintos chi custu non siat unu dannu ma un'arrichimentu.

Pro su prus s'atividade de su coro benit fata in su territòriu de nàschida, ma gai dae su primu momentu, at tocadu finas palcoscènicos internatzionales in diversos logos de s'Europa: a custu difatis si devet su nùmene, mancarì pro calicunu no siat pròpiu tipicu pro unu coro sardu.

In mesu a sas atidades de importu mannu, si distinghent sa publicatzione, in su mese de Santu Andria de su 2014, de su CD intituladu "Lu Trambucconi" e sa presèntzia ogni annu a sa tzerimònia de S'Iscravamentu e de àteros sos Ritos de sa Chida Santa in sa Crèsia Primatziale de Santu Pàulu in Terranoa. In prus, su coro, est finas fundadore e organizzadore de sa Rassegna de coros "Mesu Maju in Coro", chi si faghet in sa Basilica de Santu Simplicie e chi faghet parte de sos festamentos de su Santu Patronu, ma finas de sa manifestatzione "Nadale in Coro" in occasione de sas festas de Nadale.

In su mese de Nadale de su 2015 e de su 2019 su coro at partetzipadu a su "Fèstival dell'Avvento" de Bratislava, in sa Repùblica Islovaca e, in sa setzione de su cuncursu dedicata a sos coros folk, at retzidu pro duas bias sa Medàllia de Prata (Silver Banda). In s'istiu de su 2016 pùblicat su segundu CD intituladu "S'Indattarai", chi leat su nùmene dae sa cantone de Tony De Rosas, istòricu cantante terranoesu, chi in su CD cantat custa cantone paris a su coro. In su mese de Santu Gaine de su 2017 un'àteru reconocchimentu importante, in su 1° Prèmiu Costa Ismeralda su coro at retzidu unu mentovu de importu, pro su traballu fatu pro ispàrghere sas traditziones e sa cultura sarda.

In su mese de Austu de su 2018 at festadu sos deghe annos de atividade cun unu cuntzertu mannu in sa piazza de Santa Rughe in Terranoa.

Dae cando est istadu fundadu, su Coro Olbia Folk Ensemble est dirìgidu dae Cristiano Deriu, mastro de iscola cantora otieresa chi at mezoradu sa connoschèntzia sua gràtzias a cursos de diretzione fatos dae mastros mannos de mùsica comente a Pier Paolo Scattolin, Cristian Gentilini e Michele Napolitano. Su mastro Cristiano Deriu, a parte in sa diretzione, est impignadu finas comente cantore in su Coro Polifònicu Schola Cantorum Olbia.



IX RASSEGNA

CONCERTO CORALE MUSICA POPOLARE

MESU MAJU IN CORO 2025

BASILICA SAN SIMPLICIO
18 MAGGIO – ORE 20:00

PRESENTA ————— Daniela Astara
DIREZIONE ARTISTICA ————— Olbia Folk Ensemble

Coro

S'ISPERA

di OLLOLAI



CORO S'ISPERA DE OLLOLLAI

Su Coro Polifònicu S'Ispera, chi a oe contat 29 coristas, naschet in Ollollai in su 1996 comente coro parrochiale e in su 2001 diventat assòtziu culturale, promovende unu repertòriu de càntigos chi andant dae sa polifonia clàssica a su càntigu popolare sardu e internatzionale.

Dae su 2017 su coro est dirìgidu dae sa Mastra Maria Chiara Piras, laureada in pianoforte e in càntigu in su Cunservatòriu de Mùsica "G. P. Da Palestrina" de Casteddu.

In s'istòria sua, su coro bantat unu repertòriu particolare de mùsica de Crèsia cun càntigos de sa "Messa Magnificat" in latinu, pro coro mistu a bator boghes, ammaniados dae sa Mastra Maria Chiara Piras e publicados in su 2018 in unu libru chi at su matessi nùmene.

In sa Crèsia padronale de "San Michele Arcangelo" in Ollollai, su Coro S'Ispera organizat ogni annu un'abboju cun àteras realidades musicales de s'ìsula, su cuntzertu "Cantende s'Epifania" in occasione de sa Festa de sos tres Re.

In sos ùrtimos annos, su grupu s'est dedicadu a unu traballu sighidu de chirca, dende importàntzia a sa calidade e a s'originalidade de sa proposta musicale.

Gràtzias a sa direzione artìstica de sa Mastra Maria Chiara Piras sunt nàschidos progetos meda, in mesu a sos cales si distinghet sa cumpositzione de càntigos in limba sarda fatos impitende poesias de poetas de Ollollai matessi, ma finas torrende a leare in manu columnas sonoras de film de animatzione famados e fate·nde·las pro coros a bator boghes mistas.

In su mese de Santu Gaine de su 2021 su Coro S'Ispera at registradu su video musicale de sa cantone "Istellas e disizzos" publicadu in su canale YouTube.



IX RASSEGNA

CONCERTO CORALE MUSICA POPOLARE

MESU MAJU IN CORO 2025

BASILICA SAN SIMPLICIO
18 MAGGIO – ORE 20:00

PRESENTA _____ Daniela Astara
DIREZIONE ARTISTICA _____ Olbia Folk Ensemble

Coro
SANTA LUCHIA
di SINISCOLA



CORO SANTA LUCHIA DE SINISCOLA

Su coro de s'assòtziu culturale "Santa Luchia de Siniscola" est istadu costituidu dae pagu, ma sos 20 cumponentes suos ant un'esperientzia longa, ca in sos annos ant fatu parte de àteros assòtzios de custa calidade. Gai dae su 2012 at partetzipadu a maicantas manifestatziones, cun àteros coros, siat in Sardigna e siat in àteras regiones italianas (Valpusteria; Trentinu-Südtirol), ma finas in foras de s'Itàlia, comente su Fèstival de sas Regiones in Bèlgiu.

Su presidente de s'assòtziu est su Professore Tonino Lutz, mentres su coro est Dirìgidu dae sa Mastra, Professoressa Grazia Miscera chi at istudiadu càntigu lircu in su cunservatòriu "L Canepa" de Tàtari in ue s'est laureada in pianoforte. In mesu a sos medas, issa at dirìgidu finas su Coro Montalbo de Thiniscole e como dirigit puru su Coro Ortobene de Nùgoro.

Sa punna de s'assòtziu est cussa de promòvere sa cultura sarda in totus sas espressiones suas, dedichende-si in manera particolare a su càntigu popolare.

Su coro presentat unu repertòriu de càntigos de sa traditzione popolare, contivizados pro su prus dae sos Mastros de sa "coralidade de iscola nugoresa", chi est incumintzada in sos annos Chimbanta collende a pare totus sas espressiones de su càntigu popolare chi de tando beniant praticadas in Nùgoro.

In s'ùrtimu tempus su coro at partetzipadu a maicantas manifestatziones; intre custas, sa Festa de su Turista in Sa Caleta, organizada dae sa Pro Loco e dae su Comitadu de N.S. de Fàtima (rassegna de càntigos e ballos traditzionales).

De importu mannu finas sa presèntzia a sa serata de abertura de su Fèstival "A Mare Santa Lucia", fatu dae su ses a su oto de Cabidanni de su 2024 in sa frazione de Santa Lughia, in ue su coro at cantadu in sa famada "Ispiàgia de sas Barcas" e a pustis at postu in mostra su repertòriu sou in fatu de sas carreras de su burgu.

In fines, tocat de ammentare finas sa presèntzia a sa missa de Nadale in sa Colònia Penale de Mamone; signu de umanidade e solidariedade manna pro cussos chi, a dolu mannu, no ant pòdidu colare su Nadale Santu cun sas famìlias issoro e cun s'afetu de sa zente istimada.

Su repertòriu de su coro est fatu dae cantones profanas e religiosas, ma s'assòtziu est istudiende finas cantones noas prus a curtzu a sa cultura thiniscolesu e chi ant a èssere presentados pro sa prima borta in beranu.

